

- देश मांय नागरिकता संशोधन कानून लागू करण री अधिसूचना जारी करीजी।
- प्रधानमंत्री नरेन्द्र मोदी हरियाणा रा गुरुग्राम ऊं एक लाख करोड़ रुप्या रा खर्च वाळी 112 नेशनल हाईवे परियोजनावां री नींव रखी अर पूरा व्ह्या काम जनता ने संप्या- प्रदेश री दो नेशनल हाईवे परियोजनावां ई शामिल।
- प्रधानमंत्री कह्यो-महिला शक्ति 21वीं सदी रा भारत री प्रौद्योगिकी क्रांति री अगुवाई कर सके है-सशक्त नारी-विकसित भारत कार्यक्रम ने सम्बोधित कीना।
- राज्य मांय 317 पुलिस उप अधीक्षकां रा तबादला।

000

देश मांय नागरिकता संशोधन कानून लागू करण री अधिसूचना जारी कर दीरीजी है। ई रा तैत भारत रा तीन पड़ौसी देशां अफगानिस्तान, पाकिस्तान अर बंगलादेश ऊं 31 दिसम्बर 2014 ऊं पैली भारत मांय शरण लेवण वाळां ने भारत री नागरिकता देवण रो प्रावधान है। ई रा तैत हिन्दू सिख, बौद्ध, जैन, पारसी अर ईसाई धर्म मानबा वाळां ने देश री नागरिकता दी जावेला।

000

प्रधानमंत्री नरेन्द्र मोदी आज हरियाणा रा गुरुग्राम ऊं करीब एक लाख करोड़ रुप्या रा खर्चा ऊं बणाया जावण वाळा 1 सौ 12 नेशनल हाईवे प्रोजेक्ट री नींव रखी अर पूरा व्ह्या काम जनता ने संप्या। आं मांय प्रदेश रा दो नेशनल हाईवे प्रोजेक्ट ई शामिल है। ई मौके प्रधानमंत्री कह्यो के अ परियोजनावां विकसित भारत री आवती पीढी री बुनियादी संरचना है। प्रधानमंत्री कह्यो के 21 वीं सदी रो भारत मोटी सोच अर मोटा लक्ष्य वाळो है।

प्रधानमंत्री आज ई ऑनलाइन तरीका ऊं अमृतसर-जामनगर इकोनॉमिक कॉरिडोर रा 2 पैकेजेस रो उद्घाटन कीनो। ई काम माथे 1 हजार 799 करोड़ रुप्या रो खर्च आयो है। उपमुख्यमंत्री दिया कुमारी आला अहलकारां सागे जयपुर रा आरआईसी ऊं विडियो कान्फ्रेंस रे मार्फत ई कार्यक्रम मांय सिरकत कीनी। ई मौके उपमुख्यमंत्री कह्यो के अमृतसर-जामनगर इकोनॉमिक कोरिडोर बण जावण ऊं प्रदेश रा श्रीगंगानगर, हनुमानगढ, बीकानेर, जोधपुर, बाड़मेर अर जालौर जिला पंजाब अर गुजरात रा खास औद्योगिक शहरां अर बंदरगाह ऊं सीधा जुड़ जावेला। दिया कुमारी कह्यो के ई माली गलियारा ऊं औद्योगिक विकास सागे सैर-सपाटा अर दिसावर मांय माल बेचण मांय बधोतरी व्हेवण सागे नौकरी-धंधा रा नुवा मौका मिलेला। वे कह्यो के गेला मांय होटलां, रेस्ट्रां सागे दूजी कारोबारी हलचल बधबा ऊं स्थानीय जनता ने काम-धंधो मिलेला अर वां री आमदनी मांय बधोतरी व्हेला।

000

प्रधानमंत्री नरेन्द्र मोदी कह्यो है के झोन दीदियां अर लखपति दीदियां कामयाबी रा नुवा अध्याय लिख रही है। वे आज नई दिल्ली मांय राखी ज्या सशक्त नारी-विकसित भारत कार्यक्रम मांय बोल रह्या हा। प्रधानमंत्री कह्यो के कामयाब महिला कारोबारियां सागे बातचीत करणो वां ने देश रा उजळा भविष्य रो भरोसो दिरावे है। वे नारी शक्ति रा मजबूत इरादां री सराहवणा कीनी। प्रधानमंत्री कह्यो के सरकार री न्यारी-न्यारी योजनावां रो फायदो ले र एक करोड़ ऊं बत्ती महिलावां लखपति दीदियां बण ग्यी है।

प्रधानमंत्री कह्यो के आवता बरसां मांय देश मांय झोन प्रौद्योगिकी ने और बधावो दियो जावेला। कार्यक्रम मांय देश री 10 न्यारी-न्यारी ठाँडां ऊं नमो झोन दीदियां एके सागे झोन रा दरसाव रा कार्यक्रम मांय सिरकत कीनी। ई मौके प्रधानमंत्री एक हजार नमो झोन दीदियां ने झोन ई संप्यां। वे स्वयं सहायता समूहां ने करीब 8,000 करोड़ रुप्या रा कर्ज ई दीना। वे कह्यो के कोई ई समाज मौका पैदा कर र अर नारी शक्ति रो मान तैय कर र ई आगे बढ सके है। प्रधानमंत्री कह्यो के लारला दस साल मांय देश रा

स्वयं सहायता समूह महिलावां ने मजबूत बणावा री कहानी ओजू लिखी है। राज्य मांय ई कोटा रा सुल्तानपुर मांय गड़ेपान कने राख्यी ज्या जळसा मांय केन्द्रीय विदेश अर संस्कृति राज्य मंत्री मीनाक्षी लेखी ई सिरकत कीनी। ध्यानजोग है के हाड़ौती हलका री 104 महिलावां नमो ड्रोन दीदी योजना मांय चुणी ज्यी है।

000

सूचना अर प्रसारण मंत्रालय री ओर ऊं आज नई दिल्ली मांय आज एक गोल मेज बैठक राख्यी ज्यी। इण मांय मीडिया अर मनोरंजन रा हलका मांय महिलावां री छवि पेश करण रा बारा मांय विचार करी ज्यो। मीटिंग मांय समाचार, टेलीविजन, रेडियो अर नेटपल्क्स सरीखा ओटीटी मंचां रा नुमाइन्दा, फिल्म उद्योग री जानी-मानी हस्तियां अर कानून रा जाणकार सिरकत कीनी।

000

राज्यपाल कलराज मिश्र आज राजस्थान तकनीकी विश्वविद्यालय, कोटा मांय बणायी ज्यो संविधान पार्क ऑनलाइन तरीका ऊं जनता ने संप्यो। राजस्थान तकनीकी विश्वविद्यालय संविधान पार्क बणावण वाळो प्रदेश रो पहलो तकनीकी विश्वविद्यालय है। ई मौके राज्यपाल कह्यो के विश्वविद्यालय संविधान रा बारा मांय जाग जगावण सारू ओ पार्क बणायो है, जिण ऊं विश्वविद्यालय रा विद्यार्थियां, शिक्षकां अर कर्मचारियां ने संविधान मांय बतायी ज्या मौलिक कर्तव्यां ने पूरा करण री जाग आवेला। ओ संविधान पार्क जनता ई देख सके है। ई मौके विश्वविद्यालय रा कुलपति प्रोफेसर एस.के. सिंह कह्यो के ओ संविधान पार्क देश रो माथो ऊंचो करण अर एका ने मजबूत बणावण रो खास जतन है।

000

केंद्रीय संस्कृति राज्य मंत्री अर्जुन राम मेघवाल आज नई दिल्ली मांय नेता जी सुभाष चन्द्र बोस री जिन्दगी माथे आधारित भारत रा राष्ट्रीय अभिलेखागार री डिजिटल प्रदर्शनी सुभाष अभिनंदन रो उद्घाटन कीनो। ई मौके वे कह्यो के सरकार रा मिशन-विरासत भी, विकास भी रो मकसद भारत ने हर हलका मांय दुनिया मांय अगाडी बणावणो है।

-----

000

चुरू ऊं भाजपा रा सांसद राहुल कस्वां कांग्रेस मांय भेळा व्हे गया है। आज नई दिल्ली मांय कांग्रेस रा राष्ट्रीय अध्यक्ष मल्लिकार्जुन खड्गे वां ने पार्टी री सदस्यता दिरायी। ई मौके कस्वां कह्यो के वे चुरू री जनता री भावनावां रे मुजब कांग्रेस मांय शामिल व्हे रह्या है। वे कांग्रेस पार्टी मांय रह र किसानां रा मुद्दा उठाता रहवण रो भरोसो दिरायो। ई मौके कांग्रेस रा आला नेता सुखजिंदर सिंह रंधावा, प्रदेश अध्यक्ष गोविंद सिंह डोटसरा अर राज्य विधानसभा मांय विपख रा नेता टीकाराम जूली ई मौजूद हा।

000

राज्य रा पुलिस महकमा मांय आज 317 डिप्टी एसपी रा तबादला कर दिया ज्या। पुलिस महानिदेशक उत्कल रंजन साहू ई रा हुकम जारी कर दीना है। थावर ने ई प्रदेश मांय दो आई.ए.एस. अर 50 आर.ए.एस. अहलकारां रा तबादला करी ज्या है।

000

राज्य मांय डिजिटल तरीका ऊं भणाई-लिखाई ने बधावो देवण अर नौजवानां ने नुवी तकनीक ऊं जोड़बा सारू प्रदेश मांय पहली दफा जोधपुर रा कृषि विश्वविद्यालय मांय जियो इंफोर्मेटिक्स रो पोस्ट ग्रेजुएट डिप्लोमा कोर्स सुरू कर्यो जा रह्यो है।

-----

000

सीकर रा सांसद सुमेधानंद सरस्वती केन्द्र सरकार री खेलो इण्डिया योजना रा तैत जिला खेल स्टेडियम मांय बणायी ज्यो बहुउद्देश्यीय इण्डोर हॉल आज जनता ने सूप्यो। करीब सवा चार करोड रूप्या रा खर्च ऊं बणायी ज्यो ई हॉल रा उद्घाटन कार्यक्रम मांय केन्द्रीय युवा कार्यक्रम अर खेल मंत्री अनुराग सिंह ठाकुर ई वर्चुअल तरीका ऊं सिरकत कीनी। ई मौके स्वामी सुमेधानन्द कह्यो के ओ बहुउद्देश्यीय इण्डोर हॉल बण जावण ऊं खिलाड़ियां ने बेहतर सुबीता मिल सकेला।

000

सीकर जिला मांय खाटूश्याम जी रो मेळो आज सरू व्हयो। 21 मार्च तांई चालण वाळा ई मेळा मांय खास फूलां ऊं बाबा रो श्रृंगार कर्यो जावेला। ई सारू खास तौर ऊं फूल मंगायी ज्यो है एक सौ ऊं बत्ता कारीगर काम कर रह्या है। मेळा मांय जातरूआं री हिफाजत अर व्यवस्थावां बणायी राखण सारू पुलिस अर प्रशासन खास प्रबंध कीना है। रींगस ऊं खाटूश्यामजी मिंदर बीचे मोटर गाड़ियां नी जा सकेला।

000

प्रदेश मांय पश्चिमी विक्षोभ रा असर ऊं लारला 24 घंटां मांय कठे-कठे बादळा मण्ड्या रह्या। मौसम विभाग रे मुजब एक और कमजोर पश्चिमी विक्षोभ रा असर ऊं 13 अर 14 मार्च ने जोधपुर अर बीकानेर संभाग मांय कठे-कठे बादळा व्हेवण अर हल्की बिरखा रा आसार है।

000

जोधपुर मांय 15 मार्च ने जनता डाक अदालत लगायी जावेला। इण मांय जोधपुर मण्डल रा डाकघरां री डाक सेवा मांय काउंटर सेवा, मनीऑर्डर, बचत बैंक, पार्सल अर बीमा करायोडा सामान, डाक जीवन बीमा, स्पीड पोस्ट अर पेंशन समेत न्यारा-न्यारा मामलां रो निपटारो कर्यो जावेला। डाक प्रवर अधीक्षक एम.एल.पीपलीवाल बतायो के आं मामलां मांय शिकायतां विगतवार जाणकारी सागे 13 मार्च तांई वरिष्ठ अधीक्षक डाकघर, जोधपुर रा दफतर मांय भेजी जा सके है।

000

नेहरू युवा केंद्र जोधपुर री ओर ऊं काल जिला स्तरीय पड़ोस युवा संसद कार्यक्रम राख्यो जावेला। जिला युवा अधिकारी राजेश चौधरी बतायो के कार्यक्रम मांय मेरा युवा भारत पोर्टल, विकसित भारत नव भारत अर मोटा अनाज रा बारा मांय सत्रां पाछे मांक पार्लियामेंट सत्र राख्यो जावेला।

000